

Guangjisi Minzcu Bau

ganbhau: CN45-0036 B.2015 Nd.9 Ng.30 liggaeuq ietfeih nienz ndwenbet cibbet

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3193期

Swcigih Minzyijveij Hai Hoih Saemjgauj 《Sawloih Cuengh Gun》(Banj Daihngeih)

自治区民语委召开《壮汉词汇》(第2版)审稿会

9 nyied 23 hauh, Swcigih Minzyijveij hai aen hoih saemjgauj 《Sawloih Cuengh Gun》(Banj Daihngeih). Swcigih Minzveij、Minzyijveij cujyin Luz Yenbenj camgya aen hoih neix, vanzlij doiq hong biensaw daezok engq sang iugouz, Swcigih Minzyijveij fucujyin Yangz Gijbyauh camgya haihoih, 30 lai boux lauxhangz Sawcuengh Vahcuengh、bouxbien doiq gaujsaw daejlaeh saeqset daengj vwndiz guh yaenglwnh.

Luz Yenbenj gangjnaeuz, aeu daj giz sang guh ndei hong saw vah

minzcu bae guh hong biensaw 《Sawloih Cuengh Gun》. Dangqnaj, gij hong cujyau gih raeuz minzyij bumwnz guh hong minzcu ndawde hangh ndeu, couhdwg gyagiengz hong giekdaej Sawcuengh Vahcuengh, guh ndei hong coihdingh 《Sawloih Cuengh Gun》, doiq guh saeq guh saed hong giekdaej Sawcuengh Vahcuengh gig miz ik. Luz Yenbenj giengzdiuh, hong coihdingh 《Sawloih Cuengh Gun》 daengz seizneix gaenq aeu ndaej gig ndei cingzek, ciep roengzdaej aeu guh engqgya caezcienz di, aeu roengz

cienz gaeuq, baujmaenh biensaw cizlieng, haenqrengz guh daengz engq ndei engq hawj vunz angqcoux.

Ciuq cam rox, coihdingh 《Sawloih Cuengh Gun》 dwg Guek-gya Yijveij “cibngeih haj” gohyenz gveihva hanghmoeg, daengx bonj saw daihgaig miz 160 fanh cih saw, de dwg guek raeuz bonj sawhongdawz Cuengh Gun song cungj saw doiqciuq souloeg sawloih ceiq lai he, muenxcuk sonhag Sawcuengh Vahcuengh、biensaw、okbanj daengj lai fuengmienh iugouz.

(Veiz Yennaz/韦愿娜)

SIUSIK DINJ

简讯

● 9 nyied 26 hauh, Dasinh Yen cujiz 20 lai boux bouxgagnyienh bae fuzliyen guh bet nyied cibngux yawj-ngonz bouxlaux gyonzmaiq hozdung, soengq doxgaig caeuq hohfuk bet nyied cibngux hawj gyoengq bouxlaux、vih bouxlaux dijenj mbouj aeu cienz, vanzlij caeuq bouxlaux ciengqgo, angq-hoh aen ciet neix.

(Cinz Civanj)

● Mboengqneix, Ginhsiu Yauzcuz Swciyen Vwnzva' gvanj gawjbanh daj-siuq Yauzcuz beizyinbanh, iucingj swcigihgaep feihvuzciz vwnzva yizcanj dinfwngz dajsiuq Yauzcuz daiqbiuj bouxswncienz Cau Fungyangh daej vih 50 lai boux beixnuengx Yauzcuz hwnjdanz.

(Cinz Haijyen Bangz Yaujvaz Lanz Cunh)

● 9 nyied 22 hauh(liggaueq ndwenbet cocib), Lungzlinz Gak Cuz Swciyen beixnuengx Gwzlaujcuq angq-hoh ciet cimzmoq moix bi gvaq baez haenx, beixnuengx Gwzlaujcuq daenj buhmoq vaqmoq ngoenzciet, doxcomz youq yienhsingz minzcu vwnzva gvangjcanz, youh ciengq youh diuq, haiguq gak cungj ndawbiengz doxdax hozdung, angqhoh aen ciet minzcu conzdungj neix.

(Linz Binh)

● 9 nyied 22 hauh, youz Gungh-cwngz Yenveij Dungcanbu cawjbanh gaiq daih' it dungyiz cansen minzcu conzdungj diyyuz doxdax yindungvei youq aen yienh neix vwnzvuj gvangj-cangz gawjbanh. Ciuq cam rox, baez yindungvei neix baugvat miz sam vunz haizgieg doxdax、bengcag、dwkdomq daengj gig miz daegsaek minzcu diyyuz doxdax hanghmoeg, yinx ndaej haujlai rog gih ndaw gih hekyouz caeuq boux haenggyaez ingjsiengq daej daejniemh yawjngonz.

(Liengz Veih Cuz Canghyi)

Lozcwngz: Eu Fwen Angqhoh Bet Nyied Cibngux



罗城:

唱山歌 庆中秋

9 nyied 24 hauh, Lozcwngz Mulaujcuq Swciyen youq Cwngz-lungzhuz Gunghyenz dingzdojfwg gawjbanh “eu fwen angqhoh bet nyied cibngux” hoih-fwen, gak aen minzcu canghfwen doxcomz youq giz haenx itheij doiq-fwen, haenhdanq guekcoj hoenghvuengh, ciengq-yiengj minzcu doxgiet, angqhoh ciet bet nyied cibngux. Ndaw doz dwg gyoengq canghfwen cingq eu fwen.

(Mungz Cwnghsw/蒙增师)

Cezmuz Gofoux Vahcuengh Vujmingz Youq Daizheiq Lungzanh Yienj

武鸣壮语歌舞节目惊艳亮相隆安歌台

9 nyied 20 hauh banhaemh, Vangohcwngz·Daizheiq Namzningz·2015 Daihcibcaet Gaiq Namzningz Ciet Gozci Minzgoh Yisuz baenzroix hozdung daizheiq Lungzanh youq Lungzanh Yen dezcwngz vwnzva gvangjcanz hoengh yienj.

Banhaemh 8 diemj cung, singgyong gyukgyad heiqaenh angqyangz, gofoux 《Haenx Dwg Diendanz Vuenyungz》 hainduj youq daizheiq yienj. Gij gofoux biujyienj gaenlaeng, aen cezmuz fwen 《Beixnuengx Beixnuengx》 youz Vujmingz Yen Vwnzva

Bouxcuengh Swncienz Baujhoh Cungsim biujyienj haenx hainduj hwnj daiz, goswz feihdauh Bouxcuengh naekna, yienh'ok aen yienh neix vunzlai gak cuz sienggyaez saedcej vuenyungz. Gaenlaeng, go buenx foux 《Fwenyox Ranzcuengh》、foux 《Cingsaenz Feihdauh Gyong'vax》、go habciengq 《Mbanjcauxmoq Beksingq Ranzcuengh》、《Fwengingqlaeuj Ranzcuengh》 daengj cezmuz ndei yawj hix hwnj daiz yienj, hawj vunzlai Lungzanh roxnyinh Vujmingz Vwnzva Bouxcuengh heiqsik

naekna.

Ciuq cam rox, vih cauxmoq daizheiq neiyungz caeuq hingzsik, yienh'ok gak aen daizheiq daegsaek, bineix, gij daizheiq yienhgih youz daizheiq Namzningz laebnda haenx aeu cezmuz doxvuenh caeuq daizheiq gietdoiq guh biujyienj fuengsik, doenggyaq cezmuz doxvuenh yienj, gyagiengz gak dieg vwnzva doxgyau, hawj cezmuz engqgya ndei yawj, hawj gak aen daizheiq cezmuz engqgya mizyinx.

(Vangz Swjyen/黄子晏)

Daengq Beixnuengx

小启

Aenvih cietguekgingq cuengq-gyaj, 10 nyied 7 hauh bauqcej mbouj ok lo. Hoh gyoengq beixnuengx ngoenzciet angqyangz vuenyungz!